


UNIVERSITÂT DAL FRIÛL - I progetti inmaneats dal Ateneu spiegâts di Piera Rizzolatti e Federico Vicario, ma la indenant al è simpri plui dificil par mancjance di bêts.

» DI LISA ZANCANER

Lis machinis a fevelaran furlan



Ae Universitât si niçule un sium: chel di screâ une machine che e feveli furlan. Lu conte Piera Rizzolatti, direttore dal Centri interdipartimentâl pe ricerche su la culture e la lenghe dal Friûl (Cirf). Une ricerche scomençade tal 2005 che e larà indenant fin tal 2010. Ma il probleme par chest inovatîf progetto, come par tancj altri leâts ae marilenghe, al reste simpri chel: i finanziamenti, che a deventin, an dopo an, simpri plui smenglâts. Lis ativitâts in vore in universitât a son tantis come la ricerche che si fâs tai diviers dipartimenti in gracie dai fonts de leç regionâl 15 dal 1996, "no son grandis cifris - e marche la direttore - plui o mancul 100 mil euro ad an, che a bastin par cumò par mandâ indenant lis ativitâts di ricerche".

Il Cirf al tire finanziamenti ancje de leç 482, ma culì la situazion e je avonde amare: "A son stâts gjenerôs sul imprim, cuant che lis minorancis che a presentavîn progetti a jerin dome dôs o trê. Da-spò, cuant che a son in crescudis e a ân scomençât dutis a fâ domande di finanziamenti, a son rivâts i tais".

NO SI NADE TE CUCAGNE

Ma si va indenant distès, sorendut cui cors di formazion pai dipendents des pubblichis amministrâzjons e pai sporteliscj. Inte sachete a restin 10 o 15 mil euro, "no son cifris di mats ma o fasin ce che o vin di fâ". Ancje i finanziamenti de Arlef a dan un sburt sorendut pai assegns di ricerche e lis borsis di studi. No mancjan lis ricerchis, co-

"Ce che nus rive lu tornin in tiermins di formazion dal personâl.

In plui e mancje une strutture uniche"

finanziadis de Universitât, su la fonetiche, gramatiche, politiche lenghistiche, che a coventin a valutâ lis esigjencis ancje de didattiche.

"No nadin te cucagne - e finis Rizzolatti - ma ce che nus rive, lu tornin in tiermins di formazion dal personâl". Un ultin desideri? "Vê i letôrs par furlan ae universitât". La ponte di diamant de ativitât de universitât dal Friûl, tal setôr de formazion, al è il master "Insegnâ in lenghe furlane", un master finanziât de Arlef e destinât ai insegnants des scuelis. Daûr des peraulis di Federico Vicario, delegât de retore pe valorizazion de lenghe furlane, si podarès però fâ tant di plui. Lis ativitâts primariis de universitât a rivuardin la alte formazion pa students e la ricerche scientifice, une ativitât che e je finanziade, ma i bêcs no son mai avonde.

"Ancje se no podin sperâ di rivâ ai livei di finanziament de Sardegne - al dis Vicario - che e à destinât 3 milions di euros ad an pe lenghe sarde aes dôs universitât, o podin pontâ al mancul a un increment des risorsis a disposizion".

La sô idee e je clare: se la universitât e à di rispuindi a lis domandis dal teritori, pe alte formazion e pe produzion dai studis e strumenti di promozion de lenghe che a coventin, si à di investî su lis personis, l'unic investiment che al sigure continuitât. L'inviamen di grandis oparis su la lenghe furlane, che dome la universitât e varès di promovi, par esempi un vocabolari che al cjapi dentri ancje lis atestazzjons storichis e leterariis de lenghe, al domande une continuitât di strutture, cun ricerjadôrs preparâts, e une sigurece di finanziament che cumò no je.



alessandro.digiusto@ilfriuli.it